

PROCANCELLARIVS  
IOH. THEOPHILVS SEGERVS  
SOLENNIA  
NOVI DOCTORIS IVRIVM  
IOH. GOTHOFREDI NEVMANNI  
MARSEBURGENSIS  
VIRI PRAENOBILISSIMI ET DOCTISSIMI  
A. D. XXVII. IANVAR. AN. CIDICCLXXIIII  
IN SCHOLA I. CTORVM LIPS  
CREANDI  
INDICIT

*Praemissa est obseruatio de differentia iudicum et magistratum  
iuris dicundi apud Germanos*

1774.

7.

*Antiquar. med. age. de re iudic. et for. Fasc. II.*

*/ F. G. B. Bob.*

Jus priv. Germ.

A.

166,10

o. |



Faint, illegible text, likely bleed-through from the reverse side of the page. The text is arranged in several lines and is difficult to decipher due to its lightness and the texture of the paper.





**V**ulgo enim haec iuris dicendi ratio, haec forma iudiciorum fertur a priscis Germanis instituta moribusque maiorum seruata esse, vt idem, qui iurisdictionis potestatem haberet, causam quoque cognosceret ac decideret, nec aliis siue in cognoscendo siue in sententia dicenda veris iudicibus praeter se vteretur. Quam opinionem facile ab eorum ingenio proficisci intelligas, qui iura Romana cum Germanicis contulerunt, in quorum illa libris veterem locum tenet, nec vanis eum de causis, neque parua scribentium auctoritate ad hunc diem tuetur. Ecquis, vt e numero doctissimorum probatissimorumque auctorum duumuiros tantum excitem, IOH. THEOPHILI HEINECCII et GEORGII CHRISTIANI



STIANI GEBAVERI venerandis nominibus non affurgat? Ille vero in aureis *iuris civilis elementis* lib. IV. tit. 17. §. 1327. et 1328. vbi de officio iudicis Quiritium praecepta exposuit, et quae extraordinariae cognitiones vocatae sint, strictim tradidit, de Germanica disciplina sic pergit: *Non autem hodie observatur discrimen inter ea, quae in iure, et quae in iudicio fieri dicuntur. Iudices enim pedanei apud ipsos Romanos dari desierant, non quidem a temporibus Diocletiani, uti ex l. 2. C. de pedan. iud. colligunt, sed tamen ante Iustinianum l. vlt. Inst. de interd. Germanicae autem originis gentibus nunquam in usu fuerunt. Eoque sensu accipiendi iureconsulti, dum hodie omnia iudicia aiunt esse extraordinaria ex d. §. vlt. Inst. de interd. - - ipse magistratus et cognoscit et sententiam fert et eandem exequitur.* GEBAVERVS de iurisdictione secundum doctrinam Romanorum eiusque doctrinae in Germania usu elegantissime disputans duplicem Praetoris et iudicis pedanei personam nihil ad nos pertinere et ipse existimat, et ait interpretes nostros consentire cap. II. §. 5. Itaque mirum videatur legentibus rem omnium iudicio approbatam adeoque omnium

omnium



omnium fere aetatum scholarum que consensu atque auctoritate firmatam vocari in dubium, praesertim hoc seculo, quo desit tandem Germania peregrina instituta cum suis confundere, et reipublicae nostrae formam e Romanis antiquitatibus discere. Quin vereor, ne non nullis videar omnino ineptus atque insipidus, quem in tanta hodie luce litterarum Germanicarum non pudeat imitari praeteritorum seculorum barbariem et strenue abuti disciplina Romana ad corrumpendam iurisprudentiam. Sed hos spero mecum redituros esse in gratiam, cum in ipsis Germanorum antiquitatibus sententiam meam non obscure significatam, verum lucidissime declaratam omnino que expressam reperient, neque a Romanis arcessi, sed apud vetustissimos nostros maiores domi haberi magistratum iuris dicendi et iudicum, qui consilium illis auctoritas que adessent, discrimina.

Haec enim vicit sub civili imperio prisca Germanorum libertas, ne cuiusque lites et priuatarum rerum controuersiae, nisi a paribus iudicarentur, neque criminum et caussarum capitalium indices magistratus essent, sed qui horum iussu de



iis cognoscerent. Quemadmodum vero apud Romanos alii magistratus summae rei praecerant, comitia et Senatum, imperia in exercitu, domi legum et institutorum curam custodiamque agebant, auctores omnium rerum publice gerendarum, ne quid communis populi salus detrimenti caperet, in uniuersum consilio atque auctoritate prouidi; alii inde ab eo maxime tempore, quo consules omnia sine collegis ordinare prae negotiorum multitudine grauibantur, nec amplius populo utile videbatur, unumquemque criminis reum apud concilium accusari, publicis et priuatis iudiciis praefecti criminum quaestiones habebant, actiones litigantibus dabant et legitima cuiusque rei constituebant iudicia: sic apud nos triplex potissimum togatorum magistratum genus habetur, istorum, qui in commune consulunt et rerum ciuiliu ordinem, incrementa, publicum decus imperio et prudenti cura statuunt, tuentur, promouent, alterum; alterum horum, qui iuri dicundo praesunt, et ut suum cuique ius tribuatur meritaque de fontibus poenae sumantur, efficiunt: praeter quos sunt, qui utraque polleant potestate,

estate,



estate, cum vtramque, non tantum in summis imperatorum, regum et principum personis coniunxerit imperii nostri ratio, verum haud raro etiam inferiores, siue ab arbitrio Imperatorum et Principum, siue communi regionum instituto, et singularibus pactis, vel priuilegiis accepisse reperiantur. Caeterum Germanico idiomate istos maxime πολιτείας curatores statoresque, vel quibus publica vtriusque, quod diximus, generis potestas concredita est, communi et generali nomine *Obrigkeiten* vel *Obere*, frequenter etiam cum adiectione alterius nominis reipublicae vel collegii, cui praefecti sint, *Meister*; latine magistratos, Priores, Superiores, magistratus verteris; iudiciorum autem praesides, ne quid de Grauium, id est, Seniorum Comitumque vocabulo propter multiplicem eius dignitatis amplitudinem dicam, *Iudices*, *Aduocatos*, *Scultetos*, *Richter*, *Voegte*, *Schuldheissen* similibusque nominibus specialibus appellari, animaduertas. cf. CHRIST. THOMASIVM *de iurisdictionis et magistratuum differentia secundum mores Germanorum.*

Hos



Hos iudiciorum praesides, a iuris dicendi potestatem antiquitus habuisse, eosdem vero, quod ait HEINECCIUS, cognovisse etiam causas, et sententias tulisse, nego et pernego. Liceat Heinecio opponere ipsum HEINECCIUM. Ipse enim in *Element. Iuris Germ.* lib. III. tit. I. veterum apud Germanos iudiciorum disciplinam tam curate eleganterque depinxit, ut in ea quoque Theodisci iuris parte describenda palmam fere omnibus praeripuerit, qui post eum ad conficiendas epitomas accesserunt. Et quem, quaeso, latet prisca Scabinorum auctoritas, Comiti, Vicario, Centenario, Sculteto etiam in iudiciis, quibus quisque praeficeretur, assidentium, ut TACITO teste *Germ.* VI. consilium ei auctoritasque adessent. Etenim, quos TACITVS memorat comites singulis in concilio ad iura per pagos vicosque reddenda electis principibus iudicio cuiusque pagi ascitos, eosdem esse iudices atque arbitros, quos posterioris aetatis monimenta Scabinorum, Rachinburgiorum, Sapientum, Prudentium, (Prud'hommes) Bonorum virorum, (Bons-hommes) Sagibaronum nominibus prodidere, *durante etiamnum*, ut bene anim-



animaduertit FRID. BRVMMERVS *de Scabinis* cap. II. §. 18. *post tredecim secula a primordiis legis Salicae et Langobardicae nomenclatura*, id fere apud omnes confessum exploratumque reperio. Nec dubito, quin *centenorum* vocabulum, quod ex eo loco Taciti laudatus BRVMMERVS, REINESIVS, KIRCHMAIERVS, GEBAVERVS *Vestig. Juris German. antiquiss. diss. XIII.* eiciunt, nulla medicina restitui possit, nisi vel cum GEBAVERO *duodeni*, vel cum aliis, quos DITHMARVS ad h. l. sine nomine meminit, *septeni* legas, vel denique Tacitum dicas verbo *senden*, *senten*, a quo ad Scabinatum idonei dicti sunt *Sendbar*, *Semperleute*, non infrequenti litterarum mutatione fecisse *centenos*. Quae quidem coniectura mihi ipsi non admodum placet, cum et vsus verbi *missos* notantis pro Scabinis nequeat auctoritate idonea atque aliquo certo monimento confirmari, et τῶν *centeni* eiectione verborum Taciti integer sit sensus, praeter ea BRVMMERVS, auctore REINESIO, vnde duxerint scribae illud *centeni*, probabiliter satis ostenderit. Verum citius illius leuissimae vanissimaeque coniecturae veritatem mihi persuadeas, quam

B

*zentas,*



*zentas, centenas et centenarios, nedum centumuiros, centumuiraliaque iudicia credam Taciti id scribentis animo obuersata. Profecto, quod ille principibus per pagos vicosque iura reddentibus consilium addit, Scabini fuerunt. Hos magistratum iussa iam antiquissima illa aetate causas cognouisse et iudicasse, constans sequentium temporum inde a Langobardicae Salicaeque legis memoria observatio dubitare non finit.*

Sed id ipsum viri eruditi concedunt, nec, si pauci dissentiunt, cum iis super morej obscurae antiquitatis in praesenti disputare fert animus. Nam ad rem propositam satis est, quod positum habemus ante omnium oculos, antiquissimas Germanicarum gentium leges Scabinorum in iudiciis usum praecipere ipsiusque *duodecemuiralis iudicii* numerum, de quo praeclarissime *BVDERS* exposuit, Eddam adeo ad Othinum auctorem referre. Quid est igitur, quod viris doctis scrupulum mouet? Quid negant Germaniam iudices praeter iuris dicundi magistratus habuisse? Nempe iudicum atque assessorum officia meminerunt in Romano iure discerni, il-  
lorum



lorum infra tribunal, ceu legati tabernaculum pedatura inferius erat praetorio, posita in foro subsellia, coram quibus stantes litigatores nullum amplius iuris dicendi magistratum viderent; horum, assessorum inquam, pro ipso Praefecti, Praetoris, Praesidis tribunali adeoque in ipsius Principis auditorio praesentiam, qui tum ius dicentes veteri verbi sensu, cum extra ordinem cognoscentes consilio atque auctoritate iuarent. Tali assessorum munere non hodie tantum fungi Scabinos, sed antiquis etiam temporibus factos esse existimant. Illis igitur, quos vetustissimae iuris Germanici formulae vel de Praefecti seu Comitum potestate sub initium cuiusque iudicii sententiam dixisse rogatos commemorant; neque enim, ut hoc obiter dicam, aliud maius continet notissima verborum cantilena, *an congruum iudicandi tempus sit? an tumultus et indisciplinata in iudicio liceat prohibere?* unde, nescio, quid iuris Scultetorum in Comites, Burggrauionum in Marchiones, et Comitum Palatini adeo in Augustum Imperatorem extricavit SPECULATOR SAXO lib. I art. 52. et 59; illis, inquam, tantis tamque magni-



ficis viris homines caeteroquin eruditissimi contumeliosa verborum interpretatione vel iudicatum omnem abiudicauerunt. Praeiuat *Glossator Speculi Saxonici* lib. III. art. 78. cuius hac de re bellissimam tractationem laudat celeberrimus PUFENDORF. *de iurisdictione Germanica* P. I. cap. III. §. 3. Is ubi contrarias quasdam rationes in medium attulit, mouet tandem in alteram partem, nec eos, qui ferant, sed auctores, qui rogent sententiam, proprio iudicum nomine cohonestari debere pronunciat. Adiecit huic sententiae calculum PUFENDORFIVS, probans imprimis ratiocinium glossatoris, ex eo ductum, quod non sit iudex, nisi qui in iudicio solenniter celebrato iubendi et prohibendi potestatem habeat. En glossam! *Wer in gehegtem Ding sitzet und zu gebieten oder vorbieten hat, der ist Richter, und nicht der dasselbig halten muss. Der aber, so das Urtheil findet, muss solches thun um Jenes Gebots willen, darum ist nochmals der das Urtheil fraget, der Richter, und nicht der es findet.* Sed mihi quidem cum PUFENDORFIO fere conuenit, cuius tota disputatio redit ad verbi *iudicis* definitionem. Iudicem ille negat dici  
Germa-



Germanis hunc, qui cognoscat et sententiam ferat, sed illum, qui iurisdictionem imperio et potestate exerceat, laudato eam in rem hoc quoque glossatoris additamento: *wer ein Richter ist, soll kein Urthel finden.* I. P. S. lib. III. art. 30. *Darumb muss ja der kein Richter seyn, der es findet, sondern der, der es fraget; vt lis cum PVENDORFIO ad inanem ambitiosamque verborum contentionem reditura videretur.* Verum caeteras glossatoris ratiunculas ex const. I. C. de Assessoribus repetitas, et similes aliorum virorum doctissimorum argumentationes in Romani et Theodisci iuris collationibus improbo, quibus illi e Scabinis Germanicis tales conantur constituere assessores, quales Praefectus vrbi Romae vel Constantinopolitanae in consilio habuit, non contenti magistratibus, quos per me nominent iudices, iurisdictionem atque imperium tribuisse, nisi iisdem etiam cognoscendi decidendi que facultatem omnem oratione sua sic asseruerint, ac si eam, quam hodie passim, maxime in minoribus iudiciis, occuparunt, antiquissimo Germanorum iure instituto que obtinissent. Dicant cum PVENDORFIO l. l. §. 4.



*qui a iudice ad formandum iudicium, cognoscendas causas, sententias que suppeditandas adhibeantur, Scabinos appellari. Hoc si meminerint, nec missos, duces, comites, vicarios, recedere a sententiis Scabinorum, nedum non requisita eorum auctoritate consilio que vel cognoscere vel decernere potuisse didicerint, nescio, quid contra antiquitatis Germanicae fidem et tot publicarum legum tabularum que auctoritatem statuunt, veteri Germanico iure cognitionem omnem in ditione ac potestate magistratuum esse.*

Sentio aduersariorum voces, quorundam etiam excandescantium iras et vituperia auribus meis percipio: Heus tu! pedaneos iudices in historiam Germanicam inferes? Bellum Ieguleii Romani commentum! Cuius rei nullum vestigium nec in legibus, nec in formulis, nec sub dio, nec in palatiis vnquam apparuit, eam rem ex foro Romano, o homo insipidissime atque ignorantissime rerum Germanicarum, audes in maiorum nostrorum iudicia et conuentus adducere? Bona verba, quaeso, neque enim res conuiciis agitur. Aio Scabinos nostros antiquo populi instituto non magis assessores fuisse,



fuisse, quam pedaneos iudices, et vt tantopere decre-  
 uerit deleta que penitus in minoribus iudiciis sit eo-  
 rum auctoritas, introducto iure Romano et vanis sapi-  
 entiae peregrinae persuasionibus atque illecebris ac-  
 cidisse. Non erant pedanei iudices, quibus solam  
 factorum cognitionem obuenire Romanis legibus  
 nouimus, neque a lite demum contestata inchoabant  
 iudicium, neque positus extra conspectum magistratus  
 in subselliis iudicabant. Aut non satis cognitas habuit  
 iudicum pedaneorum apud Romanos personas CON-  
 RINGIUS,<sup>1</sup> aut id nomen, FREHERVM forte secu-  
 tus, in benigniorem sensum vsurpauit: *procul dubio,*  
*inquiens, etiam tum, nempe temporibus Taciti, pe-*  
*danei quidam fuere iudices, quales nunc in agris passim*  
*superfunt | per Germaniam. de Germanici Imperii re-*  
*publ. diff. VI. de iudiciis p. m. 203.* Sed nou magis  
 Scabinos cum veterum Romanorum magistratuum  
 assessoribus et consiliariis compares, quorum illi  
 prudentia in iure et facto cognoscendo potuerunt  
 vti et non vti, et si quis praefectus vel praeses satis  
 sibi ipse sapere videretur, monita assessorum susque  
 deque habere, ac quod ipse rectum bonum que  
 iudi-



iudicaret, ad arbitrium libidinem que suam decernere. Nam hanc assessorum sortem apud Romanos fuisse, vel ex *titulo Codicis de assessoribus, domesticis et cancellariis iudicum* clare apparet: cum e contrario Missi, Comites et Vicarii ad adhibendos in iudiciis suis Scabinos et ratas eorum sententias faciendas necessitate legis, tanquam vinculo, adstringerentur, nec Scabini olim, vt hodie passim in pagis et vicis, nudos rerum a Comite vel Sculdasio gestarum spectatores auditores que piscibus mutiores sese praeberent. Immo vero Centenarius, Sculdafius, Comes et Missus ordinato munito que iudicio omne audiendi cognoscendi que officium, quanquam ipse praesens, Scabinis tamen proprium relinquebat. I. P. S. III. 30. Quod, quantum ego quidem legere memini, nemo ostendit curatius aut publicorum monimentorum fide diligentius confirmavit BOLQVETO *Iuris publ. Gallicani* T. I. P. III. art. II. §. 2. et 3. p. 751. vbi etiam, in quod tempus ista Scabinorum auctoritas per Franciam occidentalem durauerit, scite eleganter que disquisitum, et alia inter memorabilia anno MDCCLXV constitutum reperies, vt Balliuii, Praepositi



positi et caeteri Iudices, dicto ipsis Parium sacramento a iudiciis sic rite ordinatis excederent, nec actum rerum praesentes morarentur iudicandi que libertatem minuerent. (*que nos Baillifs, Preuôts et autres Justiciers, quand ils auront conjuré les Hommes, se partent, ne demeurent au jugement, et que les jugemens, qui seront amenteurs des Hommes soient deliures. Ordonnances du Louvre Tom. I. p. 566.*) Nempe nec ciuilibus semper Comites maiores que iudices, sed plurimis sub eorum tutela iudiciis minores Sculdafios, Centenarios et alios id genus Vicarios e senioribus Scabinorum vel Rachinburgiorum praefuisse notum est, vnde hodieque Sculdafii vel Iudicis nomen in minimis etiam Germaniae vicis auditur Adeo verum, quod scribit illustrissimus BVATIVS Christianissimi Regis Comes et ad aulam Dresdensem, quam eximia eruditione mirifice ornat, legatus in praestantissimo libro, cui titulum *Origines suae de antiqua imperii Gallicani, Germanici atque Italici forma* fecit, vniuscuiusque pagi homines sui semper inuicem iudices, neminemque, nisi a paribus, conuicinis suis, quorum Capitulare Saxonum

C

cap.



cap. IV. meminerit, iudicatum, nec placita Comitum et Missorum fuisse, nisi iudicum eorundem concilia. (*Les Cantonniers furent toujours leurs propres Juges et leur Assise fut toujours ce tribunal des Voisins, dont parle le Capitulaire Saxon. — Ce qui est incontestable, c'est que le Plaid du Comte n'étoit autre chose que l'Assise des Voisins et que les Commissaires eux-mêmes s'en faisoient assister dans leur Plaid.*) tom. III. lib. XI. cap. 5. p. 373. Idem quoque de Comitibus aperte colliges ex L. LANGOBARD. lib. II. tit. XXXII. et LII. CAPITULAR. lib. III. cap. 5. et HINC MARI *Epist.* XV. cap. 14. de Missis ex *Addit. III. Capitular. c. 105.* Caeterum de Missorum in vniuersum officio iuris reddendi, seu, vt habent praecepta stilo medii aevi, iustitiam faciendi et procurandi confer, si lubet, plenissimae frugis librum FRANCISCI de ROYE de *Missis Dominicis*, recusum Lipsiae an. MDCCCXXX cura IOH. VENDELINI NEVHAUSII, Viri amplissimi.

Quae cum ita sint, quis in antiquis legibus et medii aevi monumentis Scabinos iudices appellari



ri miretur? Quem iudicis rurani rusticorum e numero depromti appellatio male habeat, si in his quoque liberorum agricultorum libertorum que iudiciis non nobiles, sed qui illis iudicium suum ordinantibus iurassent, Scabinos, praeside quidem domini iussu Sculteto, audiuisse causas et diremisse, quanquam, si qua grauior res esset et difficilioris cognitionis, petitis sapientiorum in celebri quodam conuentu responsis, meminerit? Ipsi quidem Comites caeteri que iudiciorum praesides communi iudicum nomine haud infrequenter venire solent.

v. MONTESCVSIUM *de ingenio legum* lib. XXVIII. cap. 42. Nec rarior tamen ea notio verbi Iudex, qua passim ab Italis, Francis, Gallis pro Scabino vsurpatur. Locum e *chartulario Besuensis monasterii* habet LINDENBROGIUS in *Glossario* v. *Scabinus*, vbi bis memorantur *Iudices*, quos *Scabinos* vocant, ipsi etiam *unanimitè iudicasse* feruntur. In *Glossa Latino Theodisca* est *Iudex Scepeno*. *Richtrones* vocantur in dipl. Vorm. Friderici I. Imp. ap. LUDWIG *Rel. MSS.* Tom. II. p. 195. alibi *Richter*. v. HALTAVS. *Gloss.* v. *Richtere*. *Iudicandi* autem voca-



bulum Scabinorum muneri fere proprium est. Non *chartam veterem Alemannicam*, quam ex GOLDASTO tom. II. n. 99. laudant LINDENBROGIUS et CONRINGIUS l. I. non verba TRADITIONVM FVL- DENS. lib. I. n. 99. *praecipiente Comite et Scabinis iudicantibus* sed ipsas LEGES RIPVARIAM tit. LV. SALICAM tit. LVI. LVIII. LX. et CAPITVLARIA REG. FRANC. lib. II. cap. 10. et lib. III. cap. 7. vbi Rachimburgii et Scabini *dicere, legem dicere, iudicare et Scabinorum iudicia* expressis verbis commemorantur, plenissimae auctoritatis causa excitabo. Ordinarie Missi, Comites et Vicarii *facere vel procurare iustitiam*, Scabini *iudicare, dicere sententiam vel legem* feruntur. *Sine Scabinorum iudicio nihil datur posse vel velle Comitibus.* VITA S. CAROLI FLANDRIAE COMITIS cap. 5. Adeo in regum atque Imperatorum Palatiis iudices sederunt Scabini. Sedecim Scabinos Palatii regii nominat *chart. Caroli Simplicis* apud BOLQVETVM tom. IX. p. 514. cum quibus cum episcopi etiam quinque reperiantur, obiter notes, pro reorum, caussarum, locorum que diuersitate etiam sacerdotes, maxime in palatiis regum, iudices  
inter



inter comparuisse, nec vnquam penitus antiquatam, sed ad Christianae disciplinae modum temperatam esse veterrimam consuetudinem, de qua TACITVS M. G. VII. si magistratum iuris dicendi imperia a Scabinorum officio rite seiunxeris, cum Caesare B. G. lib. VI. haud difficulter conciliandus. Verum de Scabinis iudicibus, qui in Palatio Regum atque Imperatorum sederunt, erit proxime differendi opportunior locus. Etenim omnes iudiciorum nostrorum gradus peruestigare, ab infimis iudicibus ad summos pergere, et qua ratione vnusquisque reus coram ordinis sui hominibus experiri solitus, nec penes magistratum, ne apud ipsum Caesarem quidem Augustum, sed penes solos Scabinos, et maiorem minoremue comitatum fuerit iudicandi arbitrium, denique quo seculo quibusque consiliis mos vetus tantum non exoleuerit, eam maxime ob causam destinauimus enarrare, vt vanae eorum ratiunculae retundantur, qui iudicatus et iurisdictionis discrimine non intellecto de iuris dicendi societate inter Augustum Imperatorem atque Imperii Ordines tot logomachias in publicum ediderunt. Interim, cui



volupe est, Scabinorum in Curia Regum atque Imperatorum Germaniae iudicantium non nulla videre exempla recensita, adeat IOH. HENR. BOCRISIVM diff. *de indole et natura iudiciorum Germaniae* §. 5. et BLVMIVM *de Iudicio Curiae Imperialis Aulico* cap. II. §. IX. Intelliget Principem Scabinorum esse Imperatorem, *obersten Richtern und Rechtschoepfern*, quod nomen v. ap. HALTAVS. v. *Schoepfen*.

Sed ad depellendum eum errorem umbratilem, quem principio huius prolusionis arguimus, et vnde, vt fere fit, illustris ista controuersia, in aulas postea regum et Principum atque Ordinum Imperii nostri conuentus progressa, manuit, maiore argumentorum vi, atque haecenus opposuimus, haud opus esse videtur. Non negat PVFENDORFIVS, neque enim id poterat ignorare vir tantae doctrinae, Scabinos interdum iudices dici. Sed eripere nobis conatur illud praesidium, caussando vices Iudicum, praesidium nempe, quibus saepissime functi essent Scabini, id nomen ipsis, quorum numero Centenarii quoque aliique Vicarii Comitum contineantur, conciliauisse. Cui quidem ingeniosae rationi,



tioni, non ut aduersus Pufendorfium pugnemus, quem diximus a nobis verbo magis, quam re dissentire, sed ne scholastici posthac doctores ad vindicandas suas Germanici Romani que iuris contentiones ea abuti possint, illius adeo legis auctoritatem opponimus, quae modum atque ordinem supremi in Caesarea aula iudicii describit, nec Praesidem tantum eiusque Vicarium, sed consiliarios quoque assessores que iudices nominat. tit. I. §. 2. Nullus in eo loco ad rectoram tribunalis respectus, tanto que luculentius nomenclaturae veteris non ob potestatem iuris dicendi et baculi forte gestandi vicariam, sed propter ipsum iudicatum, Scabinorum assidentium proprium munus adiuuentiae monimentum. Romanarum autem antiquitatum peritos ut cognitionis iudicum in praesentia Praetoris exemplum habeant, eoque posthac libentius iudicum magis, quam assessorum nomen Scabinis indulgeant, certe cognoscendi facultatem desinant ipsis omnem adimere, perpetua publicarum causarum iudicia recordari iubemus, quibus quidem ipsi Praetores videntur ut plurimum affuisse praesentes.

Sed



Sed reuocandus est calamus, ne epistola modum excedat, et lectoribus, quorum beniuolentiam amorem que conciliare Ornatissimo Candidato cupimus, cum huius etiam damno atque iniuria taedium creet. Etenim vt dicamus tandem, quod nunquam academia finit sine prologo dicere, decreuit Ordo noster

IOHANNI GODOFREDO  
NEVMANNO

MARSEBURGENSI

VIRO DOCTISSIMO

spectatae in foro virtutis legitimae que eruditionis praemium, supremos vtrius que iuris scientiae honores. Qui quomodo omnem ingenii, quod a natura erectissimum habet, alacritatem ad litteras discendas transtulerit, sibi que eam doctrinam, cuius ergo eum laudamus, honestissima studiorum contentione comparauerit, quid superatis iuuenilibus scholae laboribus egerit nuper in arena forensi, et quam praeclaram futuri temporis maioris que

vir-



virtutis spem faciat, ex iis, quae modestissime de vita sua ad me scripsit, tanquam ex umbra cognoscite.

Natus est, ut diximus, in celebri vrbe, quae nomen a paludibus ductum ad perennem culturae industriae laudem integro Episcopatu fecit, V. Iulii an. CIDIOCCXXXVIII. Patrem IOHANNEM GOTHOFREDVM, iuris vtriusque doctorem, et potentissimi quondam Poloniarum Regis Augusti III. in Curia ditionum Ecclesiae Marseburgensis gubernandarum a secretis, praematura morte puer amisit. Eo maiores matri ERDMVTHAE FRIDERICAE MARGARETHAE piissimae ornatissimaeque feminae ex gente *Herzogia* oriundae gratias agit, quae iustissimam ex tanta iactura dolorem educationis solertia et prudenti sollicitudine solata est, et cui inter caetera bona precatur longissimam placidissimamque senectutem. Illa puerile ingenium optimis praeceptoribus, RINGLEBIO, ECKIO A. M. LORENTIOque formandum tradidit, quorum hic vicario muneri in ecclesia patriae

D

triae



triae vr̄bis cathedrali, illorum vterque sacerdotio viuit admotus. Ab his bene praeparatus itauit patriae ciuitatis gymnasium, tantam ibi HOFMANI Rectoris erga se facilitatem et fidem expertus, vt beneficiorum memoriam nullum vnquam tempus ex animo suo deleturum esse publice spondeat. Ad nos accessit an. CIDIDCCLXVI. in album ciuium academicorum relatus d. XXII. Septembris rectore BELIO. Hic eum philosophiam VVINCLERVS, humaniores litteras vterque ERNESTVS et GELLERTVS, quo duce etiam in morum doctrina profecit, historiam catholicam atque ecclesiasticam BURSCHERVS docuerunt. Historiae iuris atque hermeneuticae artis in explicandis legibus adhibendae SAMMETVM, Eundem et BREVNINGIUM institutionum Iustinianearum, BREVNINGIUM etiam et SCHOTTVM Pandectes et iuris Germanici, praeter ea SCHOTTVM iuris publici vniuersalis et gentium, BREVNINGIUM iurisprudentiae criminalis causa adiit. In discendo iure Germanico et Canonico profuit ipsi doctrina HOMMELII, Ordinarii nostri, quem patronum optimum

mum



mum maximum merito laudat. Historiam et ius  
 publicum Imperii nostri feudorum que iura enar-  
 rare audiuit FRANKIVM. In meis quoque iuris  
 naturalis, canonici et Germanici scholis assiduum  
 eum et perindustrium esse auditorem recordor.  
 Examinando et disputando PLATNERVS *ῡν̄ ε̄ν̄*  
*ᾱγλο̄ις* eum exercuit. Denique medicinae forensi  
 apud b. LVDV VIGIVM operam dedit: tandem iu-  
 ris prudentiam formulariam didicit a ZOLLERO.  
 Quorum omnium magistrorum dexteritatem atque  
 erga se beniuolentiam in epistola de his rebus ad  
 me scripta gratus praedicat. Sic litteris egregie  
 tinctus et boni aequi que arte probe instructus  
 maturavit iter in foram. Id vt pateret, *an, si de-*  
*beantur ligna certae speciei ex silua seruiante certa ne-*  
*que in ea amplius deprehendantur, seruitus expiret?*  
 BREVNINGIO praeside, pro cathedra disquisiuit.  
 Postea tentatus ab Ordine nostro, vtrum Aduocati  
 munere dignus esset, honorificum doctrinae suae  
 testimonium retulit. Nec spes eum bona fefellit.  
 Mox enim an. seculi LXXI. Serenissimus Princeps  
 Elector creatum inter ea ab Amplissimo huius Ci-  
 uitatis



uitatis Senatu Notarium recepit in numerum suorum, sed et causas in foro orandi facultatem benignissime ipsi concessit. Hac usus est sic, ut ab omnibus probaretur, et noster etiam Ordo, cum negotiorum multitudine distraheretur, ne cognoscendis causis eorum, qui in publicis Collegii aedibus reperiuntur, et quorum cum ipsa parte aedium facta est nuper magna accessio, per delegatos ex Ordine amplius posset vacare, ob insignem probitatem et iuris peritiam eundem dicendi iuris Vicarium in loco quem diximus, constitueret. Per quam occasionem fidem eius, integritatem atque in iudicando religionem, nuper etiam in causa criminali plane perspeximus. Itaque laetati sumus consilio, quod sub anni huius initium nobis exposuit, viam sibi ad summos iurisprudentiae honores parandi. Diximus utrique examini ab his candidatis subeundo diem, quo cum spem nostram adeo superasset, unanimi eam suffragio doctoris dignitate dignissimum iudicauimus. Proximo igitur d. XXVI. Ianuarii hora II. pone meridiem recitationem inauguralem *const. XI. C. de naturalibus liberis et matribus eorum* habebit, et postera



postera luce *Supplementa Rhapsodiae Quaestiorum*, in  
*Foro quotidie obuenientium neque tamen legibus decisa-*  
*rum*, quibus Praeses Collegii HOMMELIVS tantam  
 apud omnes gratiam meruit, eodem praefide pro  
 cathedra iure consultorum defendet. Quo facto  
 Vir Summe reuerendus atque illustris

HENRICVS GODOFREDVS  
 B A V E R

Ecclesiae cathedralis Numburgensis et collegiatae  
 Vuurcensis Capitularis, Supremae Curiae Assessor,  
 Antecessor Pandectarum atque Ordinis nostri Col-  
 lega de his omnibus muneribus meritissimus mihi  
 que in paucis carus, cui Principali auctoritate con-  
 stitutus Procancellarius delegavi has vices, summos  
 vtriusque iuris honores et omnia Lipsicorum do-  
 ctorum non cupientium in Collegium nostrum co-  
 optari priuilegia Ipsi more maiorum largietur.

Quae sollennitas vt splendoris plurimum habeat,  
 optabile est. Itaque RECTOREM ACADEMIAE  
 MAGNIFICVM, ILLVSTRISSIMOS COMI-  
 TES, VTRIVSQUE REI PVBLICAE PROCE-  
 D 3 RES,



RES, GENEROSISSIMOS et NOBILISSIMOS  
COMMILITONES omnes que litterarum nostra-  
rum fautores, velint illi honorum distributioni ho-  
nificentissima sua praesentia tum apud Candida-  
tum, tum apud honestae laudis aemulam iuuentu-  
tem maiorem gratiam dignitatem que conciliare, ita  
rogo atque obsecro, vt et Candidatum et me gra-  
tissimos fore spondeam, Ordinemque nostrum id  
beneficium omni, qua possit, occasione remunera-  
turum esse recipiam. P. P. d. XXIII. Ianuar. an.

CICIDCCLXXIIII

---

L I P S I A E

EX OFFICINA LANGENHEMIA







